

**Grupo Municipal  
Socialista**

## MOCIÓN INSTANDO Ó GOBERNO CENTRAL AO MANTEMENTO DOS REXISTROS CIVÍS

O Grupo Municipal Socialista no concello do Barco de Valdeorras, en base ao disposto nos artigos 91.4 e 97.3 do Regulamento de Organización, Funcionamento e Réxime Xurídico das entidades locais e demais normativa que poida resultar de aplicación, presenta, diante do Pleno da Corporación esta MOCIÓN, en base a seguinte

### **EXPOSICIÓN DE MOTIVOS**

O próximo 15 de Xullo entrará en vigor a Lei 20/2011 de Rexistro Civil, que desvincula estes organismos do servizo xudicial, e os expedientes pasarán a ser xestionados polos Rexistradores Mercantís. Tras case que século e medio como servizo público gratuito para todos os cidadáns, a partir desa data as xestións de Rexistro, de obrigado cumprimento para todos, pasarán a ser privatizados de feito.

Ademais do custo económico que a aplicación desta lei suporá para a veciñanza, a privatización suporá ademais que as inxentes bases de datos dos Rexistros Civís de todo o país pasen a seren controladas polos 120 rexistradores existentes. Nesas bases de datos hai centos de miles de asentos con datos sensibles da máxima confidencialidade e cuxo acceso, ata agora, só estaba permitido ao persoal funcionario. A partir do 15 de xullo, os datos de todos nós estarán controlados polo persoal que presta os seus servizos nos Rexistros Mercantís, e que non están suxeitos ao estatuto dos funcionarios, no relativo á confidencialidade. Ata agora, o acceso a eses datos só estaba permitido ao persoal funcionario dos Rexistros Civís.


De acordo con datos de diferentes asociacións de consumidores e usuarios, os Rexistradores Mercantís poderían ingresar, pola xestión dos Rexistros Civís, en torno 1.200 millóns de euros anuais, e suporá a perda de 3.500 postos de traballo. Os cidadáns veranse privados das oficinas do Rexistro Civil (431 en toda España), nos seus municipios, o que implicará que teñan que se trasladar a outras poboacións (só 120 rexistros mercantís en toda España), para facer trámites obrigatorios para toda a poboación. Os veciños do Barco deberán viaxar a Ourense para calquera trámite de inscrición (nacementos, matrimonios, defuncións, tutelas, representacións legais,

expedientes de nacionalidade e outros moitos). E por enriba, despois de que se invirtiran 128 millóns de euros do erario público para a dixitalización do Rexistro Civil. Os novos xestores, ademais de cobrar polos seus servizos aos cidadáns, recibirán esa base de datos dixitalizada sen investir nin un euro.

Ante esta situación, sométese á aprobación da Corporación Municipal do Barco de Valdeorras a adopción dos seguintes acordos:

- 1.-O Concello do Barco rexeita a desaparición dos Rexistros Cívís en xeral, e o do Barco de Valdeorras en particular, e esixe do goberno central o mantemento da estrutura rexistral actualmente existente, nas condicións que ten na actualidade.
- 2.-O Concello do Barco apoia nas súas demandas aos traballadores do Rexistro Civil e o Xulgado do Barco de Valdeorras, así como as accións que se convoquen ata conquistar o mantemento deste servizo no noso municipio.
- 3.-Solicitar da Xunta de Galicia que apoie ante o Goberno Central o mantemento deste servizo de gran importancia para todos os cidadás da comunidade galega ou, no seu defecto, e tal e como se propuxo dende a Fegamp, que o servizo se transfira aos Concellos, sempre que, como di a Lei de Administración Local, veña acompañado da correspondente partida orzamentaria.
- 4.-Dar traslado deste acordo tanto á Xunta de Galicia como ao Goberno Central.

No Barco de Valdeorras, a 26 de Marzo de 2015



Asdo: Eduardo Ojea Arias

Portavoz del Grupo Municipal Socialista Concello do Barco